

## Palongē kou tik nubiega mona laimē

Palongē kou tik nobiega mona laimē. Virpindama vēsas ašounēs sava kuojelēs. Kēik pavieloutā. Bet elementaro. Juk pasaulie tēik žmuoniū, laimēs ēštruoškosiu, ta kor če beatsēminsi tuokius vākus kāp mes. Dūstam ēr leipstam dēina ēš dēinuos, omžēnā vēs kou nuors nekontēnē, nesoprontou, kas dedas aplinkou ē Pasaulē nesoprastē... Galbūtē dēltuo, ka pardaug negriniejm Tēkrūji Pasauli. Arba kāp tik mes esam anuo nagrēniejemē. Tik neaiško, katras katrou greitiau prēbēngs. R. Bredbēris bova teisos sakīdams, kad „*Kuožnos žmuogos sau – vēins vēinintelis pasaulie. Vēins vēinintelis, vēinēšos tarp daugībēs kētū žmuoniū, vēins ēr vēsomet bējē*“.

Ēr aš bėjau. Bėjau Pasaulē, bėjau vēsuomenēs, bėjau gīvenēma, bėjau tuo, kas bus pu anuo. Keturiuolēka metu, kāp aš bėjau. Kumet Pasaulis atiemē ēš monēs Žmuogo, atiemē Ideala, jiemiau Pasaulē nekēstē.

Bėjau dēinuos, bėjau miesta, bėjau žmuoniū. Bėjau anū kreivū žvēlgsniu, kumet ēno gatvē. Gal tēi žvēlgsnē ē nier tuokēi atšiaurē, kuokius aš anus ēsēvaizdouno. Tēp lēngviau. Atstumi Pasauli ē palēikti vēins. Vēins tarp daugībēs žmuoniū. Vēins patemē Pasaulie, vēins ož Pasaulē rēbū.

Pasaulis vēs dēltuo gražos! Jautous laiminga kāp Tretēsis Bruolis, Pēnktoji Šonēi kuojē, arba kāp vēina ēš tuo tozēna nokērstū Slēbēna galvū...

Laimē sostuo vēdorie longa rūtēs vēršaus. Jegu muokietom, čīderstvēškā atsēvēiptom... Noleid žemīn šēlka siūlieli. Soupounas uorē, nosētvierosi viejelē sruovē... Šaipuos ēš monēs! Pavīda ronkas, pavīda pērštā notrauk baltojē gējē, ēr laimē nolek tuolīn, soskliaudusi vēsas aštounēs sava kuojelēs.

Ont palongē viel palēikt nīkē. Ka neturi nieka, nebturi kou ē prarastē.